



114 545

## QVÆSTIO MEDICA

CARDINALITIIS DISPUTATIONIBVS

MANE DISCVTIENDA

IN SCHOLIS MEDICORVM

Die Iovis 3. Martij.

M. NICOLAO CAPPON, Doctore Medico, Præside.

*An Vinum vitæ & staturæ detrahât*

I.

**A**NIMA hominis, una & simplicissima, perinde ac Naclerus navem regit manu & clavo, uno calore, qui vis ejus est & magna potentia, eoque uno, quod is deposcit, alimento, cum ipsum, quo cingitur, corpus; tum humanum genus tuetur. Hoc initio dissimile, multiplici coctione, quæ illius opus est, evadit corpori adeo simile; ut & in ejus quæ continenter decedit substantiæ locum sufficiatur; & ejusdem, quandiu è re est, molem amplificet; & cum redundat, sepositum in parte aliqua, vi novi hominis procreatrice imbuatur. Qui porro vitæ administer est calor, humorem quo detinetur dissolvit, dissolvunt, & domesticæ, peregrinæque causæ, quæ in viventia tacite & aperte defæviunt, eaque interdum subito opprimunt. Propterea nutritionis, quâ, quod perpetuo dissipatur, perpetuo instauratur, tanta est necessitas; ut vacatio ab altricis munere, mors sit. Cum ea arcta auctricis societates: Idem enim cibus, quâ amica est substantia, nutrit; quâ moles, auget corpora spongiæ in modum poros habentia, per quos is se insinuet, & moles se diffundat: de cætero hujus, ut & procreatricis, diversa ratio: Illa quippe licet ab ortu nutricis perpetua comes, simul atque vivens ad congruentem perduxit magnitudinem, celsatione torpet: hæc vix ante firmam quàm illa sit feriata, vix ipso citius animali occumbit; illa omnibus, hæc plerisque inest: ambæ tamen gaudent consimili apparatu, & quemadmodum ad procreandum accommodatissima est caloris humorisque temperies; Ita quoque ad incrementum promovendum, calore efficaci, humore sequaci.

A

**P**ERMAGNI interest non solum ad fingendum, augendumque corpus; sed etiam ad prorogandam vitam, quis adsit calor, quis humor, quam sit idonea utriusque commistio; hic, illius frangum est; hunc, ille citò absumpserit, si excellit & vorax est. Illum hic vicissim extinguet, si nimius: ab hoc ipso tenui & aqueo, licet uberi, quam breve sit ævum, argumento sunt Cerasus, Malus persica, Pisces; quam longum, si aëreus, pinguis, & tenax, liquet ex Cupresso, Lice, Palma, quæ durant ultra ducentesium annum. Quin veluti fulget pulchræque fovetur flamma oleo facis omnis experte; facem depasta, tetra est & obscura; sic molesta ac morosa est vita, nisi calor alatur humore purissimo, nihil in se alieni ac turbidi cohibente. Nusquam autem præstantior est & copiosior, quam in muliebri utero, vitæ & corporationis officinâ; quò his est primordiis propior, hoc ad exporrigendos artus aptior; ætatis progressu semper degenerat, iisdemque descendit gradibus, quibus ascenderat; donec vitæ instrumentis usu ipsa detritis, sequatur interitus. Ut tamen diu sartus maneat, faciunt quæ deinceps accedunt, Cælum, Solum, Regio, Viçtus; in humidis locis ampliores homines, quam in arentibus; olim in Asia celsiores & formosiores, quam in Europa, ob blandi aëris molliem; Phasiani, quòd in palustri tractu degerent, proceri; in mari majores belluæ, & prope perennes aquatum rivos, latiores & sublimiores arbores, ob humoris luxuriem, in arena humiles sunt, & malignè proveniunt. Sed imprimis, quod caput est, exquirendum quæ cuiusque populi vita, quæ alimenta. Florer vigerque corpus opportunâ quiete, molestiarum vacuitate, & moderatâ exercitatione; an & ob eam rem Iuncearum virginum ac mulierum, quæ vix habent vitæ suæ modum, quasque strenua exercet inertia, vita & statura brevior, quam virorum? Ea profectò cibi potusque vis est, quam nulla res æquet. Quibus pridem in usu est lac, & placida aquæ non alentis, sed eluentis humiditas, nonne vel horrido adversoque cælo ac solo, præstant formæ dignitate, in eòsque extrescunt artus, quos mirentur omnes? nonne & dant progeniem vivaciorem, valentiorē?

## I I I.

**T**OTA re errant qui, quam nunc notare est, ævi, roboris, corporisq; diminutionem astris ascribunt. Beneficus eorum fulgor, rerum auctor est & conservator, non consumptor; nec minùs sua illos fallit opinio, qui acceptam ferunt effectis propemodum elementis, longoque temporis situ confecto mundo; quasi illa mutuis ultro citroque dispendiis ac compendiis non recreentur renascanturque quotidie; hic quotannis novâ pube non revirescat. Istius detrimenti, haud secus ac felicioris provenus causa hæret potissimum in potu ac cibo, quorum propterea tenendæ vires, quòd sint quibus vitæ addatur; sint & quibus dematur. Plane ut in eadem plaga qui calore humorèque multo circumfluunt, vastiores evadunt; ita eodem cæli habitu, qui cibo, maximèque potu, quæ corpora magis extenduntur, suapte vi humido, dulci, & mansueto utuntur, reliquis corporis magnitudine antecellunt. Summa quippe statura (quam ferè sequuntur, robur,

ac productior ætas; quemadmodum contractiorem, infirmitas, brevissimæque fatum) constat eorum compage, quæ fulciunt corpus, quæ si diu servantur humida & lenta, promptam habent ad incrementum mollitudinem & facilitatem, sin præpropere siccata durentur, rigeant, sursum erigenti calori non pareant, faxeamque soliditatem adepta, proferri amplius nequeant, subsistit accretio, & quidem ita, ut quibus in locis egregia altissimorum hominum roborâ existerant, exiliora & turpiora visantur corpora, fugaxque vita decurrat velocius.

## I V.

**V**INUM, terræ sanguis, siccus est & calidus succus è maturis vuis expressus, qui fervendo vires comparavit: is liquor tamen à multis, quibus est ambrosiâ potior, tanti fit; ut eo sublato, vivere recuset: Iure tamen prudens rerum dubitet, potiusne, an alimentum, medicamentumve, an veriùs voluptarium sit venenum. Qui in homine summam manuum, oculorum, & linguæ petulantiam, mox hæsitantiam & incerta verba, incertosque gressus; ipsûmet statim sædissimè stratum, & bruto posteriorem in vomitiones effundi, diffusâ demum in æmentem, imisque sensibus oblivione ac torpore, altissimo somno obrui viderit, quidni tanquam veneficij reum ceter, qui id poculum dederit, quo sic homo hominem exuit? Certè vinum, vel si modus adsit, innocens nullum, & hoc nocentius, quò nobilius. Equidem dissolutos, defectos excitat, animis sollicitis onus eximit: & nisi eo nos quotidie prolueremus, haustum, velut extra admotum, morbis passim mederetur aliquibus. Cave putes esse in potulentorum censu,eductus ex uvis, pyris, malivæ succus, potus noster est; Naturæ, aqua, in qua, qui illius nutu reguntur homines, animantisque ceteræ acquiescunt; & eum æstus ora ac viscera torret, unam desideramus aquam: non vinum quod sitim, quam illa sedat, accendit, auctâ etiam bibendi aviditate. Nec justius alimentis annumeraveris. Corpus siquidem quod pessimè alit, immutat, læditque gravissimè; scilicet ventriculo acceptum, minimèque mitigatum, quod sit contumax & coctionis impatiens, citissimè suum virus quoquo versum spargit penè integrum; acri & è putredine nato calore, à naturali qui mitis & blandus est, alienissimo, igneque quo pollet ardore, salutarem partium humorem helluatur, corpus, ceu morbi solent, coquit, exest uritque vitalia, leni semper humore irriganda, suâ sanie omnem veri sanguinis seminisque succum vel ebibit, vel corrumpit, nervos quibus corporis firmitas continetur, elidit. Vis plura, tam est ad nocendum efficax, ut per nutricis corpus, alumnus infantem necet.

## V.

**Q**UANTA homini pestis sit vinum quàm corpus mentemque miserè sauciet, docent faciei, nunc pallor, nunc turpis rubor, sætens anima, tremulæ manus, obtusi sensus, ulceratorum oculorum, ut & ingenij hebes moriensque acies, mors memoriæ; ac si pridie plusculum te invitaveris, hali-tus, ructusque sædi, sitis, inquietas nocturna, furiales somni, dissolutæ malæ, pendulæ buccæ, *δυσκαρδία*, languidum corpus, fractus incessus. Quan-

tum & ad carpendam ætatem, corrumpendamque staturæ celsitatem valeat, nisi vis ejus cessat in homine, revincunt simiæ, Melitenisæ catelli, & reliquæ quibus digiti sunt quadrupedes, quas negant crescere meri potu assuetas. Quisquis vini voluptatem sectatur, latus præbet apertum hosti insidiosissimo. Quo nempe modo, qui stirpium radicibus calcem, finumve, subjicit, præcoces fructus evocat, stirpem ipsam in præmaturum senium impulsam citius perimit: sic vinum dum festinatam pubertatem elicit, vitam præcipitat, ulcerosum ac putre corpus mutilat. Quantam verò necesse est fieri decessionem sæculorum sublabentium tabe, vitio à parentibus in liberos abeunte, & vetustate jam corroborato. Orbem terrarum lustra. Græcorum qui jam usque à prisca temporibus vites habent, corpora exanguia, colore, macie, & brevitate deformata, partus propè abortivi. Italogum, Gothorum, Longobardorum, Nerviorum, Germanorum, Gallorum olim candidorum & rutilorum, aliorumque non paucorum, quamdiu vinum ignorarunt, quæ oris species, quam pulchra, vegeta, & grandia corpora, quam longa ætas? Contra Afris quondam tennes & pusilli, & quicumque vini potu corporum dignitatem perdiderant, ex quo Vati callido, at nefando addicti, istud ignaviæ fomentum ejurarunt, prolem corporis indole eminentiorem ac generosiorem summisere. Et Seres, illique Macrobij dicti Æthiopes, aquæ potiores, nonne vitam multò, quam mortales cæteri, diuturniorem coluere. Sic sunt res humanæ, ut primum voluptas vivere cæpit, vita ipsa desit.

*Ergo Vinum vite & staturæ detrahit.*

Proponebat Lutetiæ CLAUDIUS BERGER,  
Parisiinus, A. R. S. H. M. DC. LXVII.

---

PARISIIS,

Ex Typographia FRANCISCI MUGUET, Regis ac  
Illustris. Archiepiscopi Paris. Typographi.